

MUSICA

BACKS ED AUTER

da H.

Back cun slang

Els èn da return. Quasi «back cun slang», e quai lura anc co! Las Liricas Anals han battegià ils 7 da mars il nov album Analectrica. Per ils fans è quai stà in act da pazienza. Betg il concert, quel ha cumenzà fulminant e finì pompus. Sco quai che chavacristals tiran ils stgazi or da la muntogna, han las Liricas tratg lur stgazi or dal cristall da plastic: il terz album. Per quel han els laschà temp. Uschè ditg che la glièud ha già discurrì d'ina separaziun, d'ina mort da la band. Trais diers onns per ils fans e per la musica rumantscha. Ma quels 3 onns han valì la paina da spetgar. Analectrica porscha musica che lascha sautar mintga anc uschè pitschna cella dal corp. Ils beats da hip hop cumbinads cun sound electronic èn in'etichetta nova per la gruppa rumantscha, in etichetta che stà bain a la gruppa e mussa ch'els, sco artists, na stattan betg airi. Dal tuttatatg nov è quel stil da musica dentant betg. Deichkind, la gruppa da hip hop tudestga, è forsa il meglier exempel per il nov stil da la subcultura da musica rumantscha. E quella subcultura porta ussa quels tuns vinvant en Svizra. A Lucerna, Aarau e Bienna èn els p.ex. già stads. Suandantas datas èn da suttastritgar en voss chalender: ils 25 da fanadur a l'Openair Lumnezia, ils 15 d'avust a l'Openair Gampel e per dapli, guardai sin www.anals.ch! Qua resta be pli da dir: as mettai en sin notgs lungas e diras per voss corp. Sche las Liricas van sin il palc, lura vegn sautà fin che las chommas èn blauas.

Back to the roots?

En il cas da Mando Diao n'è quai betg il cas. Insumma, il cuntrari è il cas. Avant quatter mais han els edì lur 5avel album. E sco quai che las Liricas èn stadas en il Riders Palace a Laax, èn er ils Svedais stads emnas pli tard en quella location. Jau sun già in fan dad els dapi ch'els èn daventads renomad cun «Bring'em In». Els han purtà l'indie-rock sin in nivel pli aut che quai che tut las autras bandas d'indie èn stadas bunas. Betg mo pervia da lur beats e lur melodias tipicas, mabain pervia da las vuschs excentricas dals chantadurs Björn Dixgård e Gustaf Norén. La glièud en la band è restada la medema, las vuschs: anc adina quai che porta la band. La musica dentant ha pers il tipic stil da Mando Diao. Beats che van

sut la pel e che laschan mover las chommas senza ch'il chau stoppia pensar. Mando Diao è daventà pop. Durant tut las represchentaziuns che jau hai vesì dad els n'hai jau mai udì ina chanzun che lascha prender l'amiamenta bratsch e dar bunas. Balladas n'eran betg en il program da Mando. Quai è uss il cas. Per muments energetics han be las chanzuns veglias procurà. Tgi sa, forsa che Mando ma po puspè persvader en la proxima represchentaziun? A l'Openair St.Gallen che ha lieu dals 25 fin ils 28 da zercladur.

The Dandies

Quest num è da tegnair endament! Ils trais musicists da Lucerna èn giuvs, sunan indie respectabel e per las dunnas: els èn er in daletg per ils eglis. Els èn sa mussads en la Villa Babilonia (guarda artitgel en Punts nr. 176) e l'han transformada en in tschaler plain energia. Per ulteriuras infurmaziuns: www.mx3.ch u www.myspace.com/thedandies.

H. aka **Adrian Stecher** (23) è student da las ciencias da medias e communicaziun a Friburg. Il plaschair per la musica al ha già tschiffà d'uffant. Il bab è organist e la mamma sunava excellentamain la flauta, uschia ch'el ha sunà sur blers onns il triangul. Per el è musica insatge che unescha, perquai na pudess el betg imaginar ina vita senza musica. Per las PUNTS va el a la tschertga da novas bands naziunalas ed internaziunalas e rapporta da concerts, albums ed experientschas fatgas cun la musica. Per il Radio Rumantsch moderescha Adrian tranter auter mintga segunda sonda la parada da hits.